

Nozibele na Nywele Tatu?

Tessa Welch
Kiswahili





Hapo zamani za kale,
wasichana watatu walienda
kutafuta kuni.

Ilikuwa siku yenye joto kwa hivyo
walienda mtoni kuogelea.

Walicheza wakirushiana maji na
kuogelea.





Ghafla, waligundua kuwa saa zilikuwa zimeenda.

Waliharakisha kurudi kijijini.

Walipokuwa karibu nyumbani, Nozibele aliweka mkono wake shingoni.

Alikuwa amesahau mkufu wake!
“Tafadhali rudini nami!” aliwasihi marafiki zake.

Lakini, marafiki zake walisema kwamba saa zilikuwa zimeenda sana.





Kwa hivyo Nozibele alirudi mtoni pekee yake.

Aliupata mkufu wake na kuharakisha kurudi nyumbani.

Lakini, alipotea gizani.

Kwa umbali aliona mwangaza ukitokezea chumbani.

Aliharakisha kuelekea chumba hicho na kubisha hodi mlangoni.





La kushangaza ni kuwa mbwa ndiye aliufungua mlango na kusema, “Unataka nini?”

“Nimepotea, nahitaji mahali pa kulala,” Nozibele alisema.

“Ingia ndani, au nikuume!” mbwa akajibu.

Nozibele aliingia.

Kisha mbwa akasema, “Nipikie chakula!”

“Lakini sijawahi kumpikia mbwa chakula,” Nozibele aljibu.

“Pika, au nikuume!” mbwa akasema.

Nozibele alimpikia mbwa chakula.





Kisha mbwa akasema, “Nitayarishie kitanda.”

Nozibele akajibu, “Sijawahi kumtayarishia mbwa kitanda.”

“Tayarisha au nikuume!” mbwa alisema.

Nozibele alitayarisha kitanda.



Alitakiwa kumpikia, kumfagilia na kumwoshea mbwa kila siku.

Kisha siku moja mbwa alisema,
“Nozibele, leo nalazimika kuwatembelea marafiki zangu.

Fagia nyumba, pika chakula na uoshe vitu vyangu kabla sijarudi.”

Mbwa alipoenda tu, Nozibele alichukuwa nywele tatu kutoka kichwa chake.

Aliweka mmoja mvunguni mwa kitanda, mwingine nyuma ya mlango, na mwingine ndani ya boma.

Kisha alikimbia kwenda nyumbani haraka alivyoweza.





Mbwa aliporudi, alimtafuta Nozibele.

“Nozibele, uko wapi?” aliita kwa sauti.

“Niko hapa, mvunguni mwa kitanda,” unywele wa kwanza ulisema.

“Niko hapa, nyuma ya mlango,” unywele wa pili ukasema.

“Niko hapa, ndani ya boma,” ukasema unywele wa tatu.

Papo hapo mbwa alifahamu kuwa Nozibele alikuwa amemdanganya.

Kwa hivyo alikimbia moja kwa moja hadi kijijini.

Lakini, ndugu zake Nozibele walikuwa wamemsubiri kwa fimbo kubwa.

Mbwa aligeuka na kukimbia na hadi leo, hajawahi kuonekana tena.




Nozibele na Nywele Tatu?

Writer: Tessa Welch

Illustration: Wiehan de Jager

Translated By: Ursula Nafula

Language: Kiswahili



© African Storybook Initiative, 2014 , 2014



This work is licensed under a Creative Commons Attribution
(CC-BY) Version 3.0 Unported Licence

Disclaimer: You are free to download, copy, translate or adapt this story and use the illustrations as long as you attribute or credit the original author/s and illustrator/s.

Saide 
South African Institute
for Distance Education

www.africanstorybook.org
A Saide Initiative